

Predgovor

Ovaj master rad bavi se analizom pojedinih pravnih stavova o postojanju krivične odgovornosti pravnih lica, zatim istorijskim razvojem te regulativi tog pravnog instituta u modernim savremenim pravnim sistemima s ciljem da se dokaže osnovanost njegovog postojanja.

Postojanost krivičnih sankcija koje se primjenjuju prema pravnim licima odgovornim za izvršenje krivičnog djela su svakako djelotvorno sredstvo u suzbijanju privrednog kriminala i šalju nedvosmislenu poruku da niko ko je kriv, odnosno krivac neće ostati nekažnjen, ali to će biti predmet i glavne i pomoćne hipoteze pa detaljnije i opširnije o tome u radu.

Posebno je zanimljiva činjenica da se radi o pravnim licima pa će zanimljivo biti s obzirom na prirodu pravnih lica pojasniti krivične sankcije koje su predviđene za njih kao potencijalne izvršioce krivičnih djela, te uočiti razliku od sankcija koje se primjenjuju prema fizičkim licima odgovornim za izvršenje krivičnih djela.

Zemlje zapadnog Balkana prošle su kroz period tranzicije u kojem se mijenjalo kako državno uređenje, tako i svi ostali segmenti sa prelaskom na tržišni oblik privređivanja, u kojem su nastajali i potpuno novi krivični zakoni. Zadnjih dvadeset godina ustanovljen je trend rasta privrednog kriminala posebno kada su u pitanju zemlje bivše Jugoslavije.

U svrhu spriječavanja porasta privrednog kriminala vršene su i izmjene krivičnih zakona kako bi se pospješila efikasnija borba protiv porasta privrednog kriminala, a kada su zemlje bivše Jugoslavije u pitanju posebno u procesu privatizacije državnih preduzeća. Formirani su i posebni privredni sudovi koji bi se bavili samo privrednim kriminalom.